

Operaris che a smontin une cabine dal telefon, le cjariin suntun camion e a van; dôs feminis che ur corin daûr, ju fermin ur fasin fâ recsum e tornâ duncje sul puest di prime, scjariâ chê cabine e rimontâle tâl e cuâl. Al è sucedût za cualchi setemane a Codroip, in plen centri.


La storie e scomence un pôc prime, cuant che i dirigjents dal gnûf Cafè Leterari Codroipês, cun a cjâf la presidente **Luisa Venuti**, a pensin di realizâ intal cjâf lûc dal Friûl di Mieç une Bibliocabine, ven a stâi trasformâ une cabine telefoniche dismetude intun contenitôr public di libris là che ognidun al pues jentrâ, sielzi, e puartâsi vie il libri che al vûl, ma ancje là che ognidun al pues puartâ i libris che a cjase i cressin. Cheste no je di sigûr une novitât, parcè che tal mont chest al funzione di date viere, soredu intai Paîs dal Nort e dal Centri Europe. E no nome cun lis vieris cabinis di telefon, ma ancje sot dai arbui (ben protets, s'intint, da la ploie) come par esempli intune da lis placis principâls a Bratislave, in Slovachie.

Benon! Chescj dirigjents dal sodalizi leterari a fasin ducj i pas necessaris in Comun par vè dutis lis cjartis in regule par podè meti in vòre cheste lôr bieie idee. I aminstradôrs comunâi si dimostrin ancje lôr entusiasts, ferbints di cheste gnove iniziative che di sigûr e rint plui siore la citât.

Tal ciâf lûc dal Friûl di Mieç, il Cafè Leterari Codroipês al à trasformât une cabine telefoniche dismetude intun contignidôr public di libris. E par un pêl no le àn puartade vie par erôr.

» DI FLAVIO VIDONI

## La bibliocabine di Codroip



Una bibliocabine come chê fate a Codroip

“ I aminstradôrs comunâi si dimostrin entusiasts di cheste gnove iniziative che di sigûr e rint plui siore la citât

Tal zîr di pôc timp, chel che la burocrazie e impon par perfezionâ ducj i siei passaçs, la autorizazion e je pronte. Si trate nome di lâ a ritiràle.

### SALVADE IN EXTREMIS

Propit in chê dì che la presidente e veve decidût di lâ in municipi a cjoli il

document ch'al autorizave la realizazion de Bibliocabine, i rive une telefonade di une socie che e jere al corint di ce che il Cafè Leterari al stave immaneat: Luisa, a stan disfant la cabine e la stan puartant vie. Si pues immaginâsi ce che al è sucedût subit daûr: la presidente che e monte in machine e a dute velocitât e cor in place e, montade su la amie si bute al inseguiment dal camion e da la cabine che chel si puartave daûr. Par fortune che cualchidun al veve viodût ce direzion che il mieç al veve cjapât e cussì l'inseguiment nol è stât propite tant lunc. Si pues ancje immaginâ la sorprese di chei doi operaris a viodisi blocâ la corse di dôs feminis scognossudis. E po dopo, ancjemò di plui cuant che a sintin il motîf di chê fermade.

In ogni câs i doi operaris a àn capide al svol la situazione e a son tornâs sui lôr pas rimetint la cabine al so puest, lassantle cussì come che le vevin cjadade prime di smontâle, pronte a ricevi i libris e i prossims letôrs.



ilfriuli@ilfriuli.it

### ■ PITURE E POESIE

#### Centazzo cun Zannier a Vençon

Elarà indevant fint ai 27 di Setembar la mostre “Mariveôs Friûl” di **Giovanni Centazzo** a Vençon li dal Palaç Orgnani Martina.

Tal catalic che al compagne la mostre, dongje des oparis dal mestri nassût a Manià tal 1942 ma che orepresint al opare a Cordenons, ancjemò une volte a son lis poesiis di **Domenico Zannier** di Marian, classe 1930 e za candidât par ben dôs voltis al premi Nobel, tal 1986 e 1987, di bande des Universitâts di Innsbruck e Salisburc.

### Il teme des oparis dal mestri

Centazzo al è il paisaç, cun cuadris che a cjalin aes monts, aes gravis dal Tili-ment, fint jù ae lagune e al mâr, puartant su tele chest “piçul compendi di Univers”, come che il Nievo al definive il Friûl: “Une mostre di gjoldi, di vivi considerade la profunditât de nature cirude che e devente une necessitât comunicative di un amôr infinit par un Friûl di mil musis” al à declarât **Fabio Di Bernardo**, sindic di Vençon.

### SCOLTADIS DI DRIUS

#### Il fi pierdût

Gno fi a scuele al vâ une vore ben. A l'è tornant a cjase che si piârd.



## Plui miedis a Triest (134) che a Udin (92)

Triest e bat Udin te pussibilitât di acedi al cors di lauree in medisine e chirurgjie. Pal gnûf an academic l'ateneu dal cjâf lûc julian al imatricolarâ 134 students, 42 in plui respit a Udin dulà che lis puartis de facultât si vierzaran a 92 che a vuelin deventâ miedis.

“Un disequilibri clâr, l'enesim, tai confronts di Udin ancje se e à plui utents e plui strutturis sanitariis che a operin sul teritori provinciâl respit ae aree triestine”, al dîs il president de Provincie di Udin Pietro Fontanini te denunzie de evidente diference tra lis dôs universitâts. “Une distribuzion des oportunitâts te aree mediche che no je corete tai confronts di Udin e che e favoris Triest – al zonte Fontanini – che e va insiem a altris disparitâts a dam dal Friûl, simpri in chest setôr, come il tai dai primariis. A paiâ il

### Fontanini al denunzie il disequilibri e al scrîf al retôr De Toni

presit plui alt de riorganizazion a son stadis lis strukturis di Udin e Pordenon. In some un disequilibri daûr chel altri e in cjamps diferents; cussì pardabon il Friûl al continuerà a jessi tibiât e, magari cussì no, anulât di Triest. Il percors al somee aromai segnât di tancj – masse – segnâi evidents”. Fontanini al vûl sclâr la cuistion; cussì al à mandade une letare al retôr dal ateneu furlan Alberto Felice De Toni. Un impegn coerent e che al ven daûr al sô rûl di firmatar dal “Pat Universitât – teritori furlan” dal 2008 sotscrit a Palaç Belgrât cu lis istituzions locâls, da la Glesie a lis categoriis economicis e des associazions sindacâls. “Un Pat – al ricuarde inmò Fontanini – che al à la finalitât di strenzi lis istituzions fur-

lanis ator dal lôr ateneu, che la sô storie e je nassude propit cu la facultât di medisine dulà che tancj students a vuelin jentrâ, stant che e rapresente une ecelence de Universitât furlane cussì come la cualitât de assistenze dade ai malâts in ducj i ne-stri ospedâi”.

Fontanini al pant dubis ancje su la consistence, a nivel regionâl, des gnovis imatricolazions ai cors di lauree di medisine e chirurgjie. “Intant che, tra Udin e Triest, a vignaran acetâts 226 gnûfs students, in Venit i puecj disponibii a son 580 tra i ateneus di Verone e Padue; plui grande inmò la diference cu la Campanie cu la prevision di 1061 gnovis jentradis. Diferencis che a van daûr cence dubi ai diferents “numars” des regions in



Euronews informa

tiermins di popolazion; culi il contingjent di imatricolazions al è un vore plui grant di chel previodût pe nestre Regjon. Une reflexion in chest sens e va fate – al zonte Fontanini – ancje ae lûs de mancjanca di miedis che si presente pai prossims agns e che nus puartarà, forsit, a cjapâ sù professioniscj di fûr regjon o adiriture paîs”. Fontanini pal prossim an al sburte par che a sedin dàts i puecj daûr des peculiaritâts e de storie de Universitât dal Friûl, nassude propit de facultât di medisine.